

Zeitschrift: Annalas da la Societad Retorumantscha
Herausgeber: Societad Retorumantscha
Band: 78 (1965)

Nachruf: En memoria da scolast Giusep Maissen, Cuera : 8.12.1963
Autor: Beer, Ignazi

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation


L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 16.02.2026

ETH-Bibliothek Zürich, E-Periodica, <https://www.e-periodica.ch>



Scolast Ginsep Maissen

En memoria da scolast Giusep Maissen, Cuera

† 8. 12. 1963

Cuera, ils 8 da december 1964

Miu car amitg,

Igl ei oz gest in onn. A mi para ei sco sch'ei fuss stau pér da cuort, che quella tresta nova da Tia mort ha surpriu nus tut anetgamein. Lezza dumengia damaun, aunc avon che l'aurora annunzi il di naschent, has Ti surdau Tia olma al suprem Scaffider. Per Tia cara famiglia, per tut Tes amitgs ed enconuschents ei quei stau ina frida zun dolorosa, in cumiau aschi anetg per adina. Nus savevan che Ti vevas onns en ed onns ora giu da purtar in buordi da lavur pli grevs che quei che Tias forzas lubevan, che veva la finala sfracau e terrau Tei avon temps. Il renunziar alla direcziun dil chor da baselgia, *Tia* ovra, che Ti vevas tgirau e promoviu pir che la poppa da Tes egls duront 25 onns — jeu sai quei fetg e bein — fuva stau per Tei apparentamein in levgiament, mo el medem temps era l'entschatta d'ina gronda disillusiun. Ti has bein cuschiu e mai rebattiu las guotas era sch'ellas eran bien e gittas, internamein has Ti pitiiu grevamein, quei che ha dau nutriment al schiarm da Tia malsogna.

E nus quitavan che Ti seigies serefatgs, pertgei nus vesevan ed admiravan Tia activitad da cumponist e vessan mai cartiu che Tiu festginar tondanavon da vuler metter sut tetg quella e tschella mona bein madira seigi dictaus d'in presentiment ch'il di mondi prest da rendiu. Ti tez savevas co ei stetti e fuvas preparaus pil viadi grond en la perpetnadam. Jeu stoi confessar, sco mo paucas gadas en mia veta ha Tia mort danovamein fatg levar en miu intern per muments dubis e sentiments che la roda dil destin seigi nuot auter ch'ina malgestadam completa. Ussa che Ti vesses giu empau pli bi, che Tes affons fuvan cun excepziun d'ina feglia sur l'aua vi, che Ti s'occupavas mo pli da Tia scola e da Tiu cumponer canzuns, fuss ei

stau da cuir a Ti zaconts pli bials dis da serasontga, pertgei digl aschinumnau suleagl dalla veta has Ti saviu guder zun pauc.

Da Tia veta ch'ei stada in permanent cumbat d'existenza, ina lutga cuntinuada per il bi ed il bien e per il beinstar dalla giuventetgna e buc il davos in sincer e verdeivel laud al Segner vi jeu retenir zacontas staziuns per mauns da generaziuns vegnentas:

*

Giusep Maissen ei naschius a Mustér igl onn 1906. Leu ha el frequentau las scolas primaras e la secundara claustrala. Lu serenda quei giuven quiet mo intelligent al seminari da scolasts dalla scola cantunala. Siu aug, prevost catedral Deflorin ha fatg pusseivel a siu nevs il studi ed era dau tegn e sustegn a quel en uras e temps d'emprova. Giusep Maissen ei per cletg gia la bial'entschatta staus perschuadius che sia carriera futura dependi diltuttatfatg da sia atgna lavur, pertgei cun agid jester e cul susteniment da gronds protecturs ha el mai saviu far quen. Maissen ha sfullau sez la via egl avegnir. Che ual il professor da musica Ernst Schweri, da lezzas uras mo en survetsch da «vischandèr» alla scola cantunala, ha influenzau en moda decisiva Giusep Maissen ei fetg capeivel per tgi che ha giu il cletg d'enconuscher omisdus. L'urdadira marcanta, seriusa, che lai mitschar mo darar in fin surrir mo ton pli cordial. Mo vesamein avischinabels. Ina gada ch'il glatsch fuva sgargliaus, lu era l'amicezia perfetga. Prof. Schweri p. m. ha capiu da svegliar el giuven student sursilvan buca mo igl interess per la musica seriusa, sacrala e profana, igl ei auncallura reussiu ad el d'envidar en siu scolar igl anim grond da dirigent. Che las premissas fuvan secapescha dadas ei cert. Igl ei stau oravontut il meret da prof. E. Schweri, sch'ins ha encunter veglia da certs signurs elegiu Giusep Maissen 1929 scolast alla scola dalla Cuort.

Il scolast

Cun excepziun digl onn 1934/35, che Giusep Maissen ha frequentau l'academia da musica a Turitg, eis el staus scolast alla scola dalla Cuort tochen la mort. In excellent scolast cun ina disciplina da fier ed ina consequenza e logica nunballuonta. Ina disciplina

che veva sia ragisch el profund dalla persunalitad sezza. Tener a mistregn ina societad da 40 ni schizun 50 scholars dil marcau, sco quei che scolast Maissen ha giu da far biars onns, gliez drova buna gnarva e bia pazienza. Mo darar stueva el alzar la vusch e dar in «giap», dil qual el sez sesmarvegliava pir che zatgi, laschond suandar siu lev mo cordial surrir. Ses scholars savevan con ch'ei possi aunc vertir e con buc. Ils pli vivs, quels che dattan per ordinari da slignar al scolast, ils ezs capeva Giusep Maissen cun inschign tut special da far semetter el stadal e da far trer il carr da camifo. Fetg rigurus e pretensius cun sesez, saveva ed astgava el pretender era da ses scholars lavur da vaglia. Per el fuva buca la derivonza dils scholars decisiva, mobein la prestaziun dil singul. El era la gestadad sezza. Ed ual perquei mavan ils scholars bugen a scola tier scolast Maissen. El sez preparava per mintga lecziun cun ina conscienziusadad admirabla, currigeva ils carnets d'in di a l'auter e saveva captivar ses discipels ch'ei era in plascher. A numerusas amognas da far surpender in'autra piazza en in liug d'anoragiu, pagada bia meglier, ha scolast Maissen adina puspei dau canaster. El leva survir e restar fideivels al principi che sia scola representa aunc oz, ademplend sia missiun tenor meglier saver e puder. Sia mort ha muntau per la scola dalla Cuort ina greva sperdita.

Ses collegas apprezzavan Maissen muort sia aviartadad e cordialitad. El saveva selegrar dil success da ses amitgs e collegas e scheva era valer il meini dils auters. Criticar zatgei fuva buca sia moda, schebein ch'el vess forse ina gada ni l'autra giu tutta raschun da far quei.

Il dirigent e cumponist

Dotaus d'ina fina udida musicala assoluta, ina qualitat che maunca a biars musichers da professiun, ei Giusep Maissen sefatschentaus gia duront il temps alla scola cantunala en moda zun activa e perseveronta cul studi dalla musica profana e sacrala. Tier prof. L. Deutsch ha el giu caschun da scular e cultivar sia biala vusch da bariton, ch'el ha pli tard mess a disposiziun e schau resunar dallas gadas oravontut en laud e honor dil Segner a caschun da nundumbreivels survetschs divins. Ad ina megliera perfecziun da sias capacitads musicalas sco dirigent, organist e cumponist ha la

frequenza dalla academia da musica a Turitg igl onn 1934/35 contribuìu grondamein.

Dirigent Giusep Maissen veva buca basegns da copiar ni l'interpretaziun ni la moda e maniera co exequir quella e tschella pli gronda ovra musicala. El veva sez in meini musical e beincapiu buca in schliet, deva denton buca suatientscha a mintga buf e ventatsch che vul saver nuot pli da quei ch'ils gronds cumponists da num e pum han prestau, taxond tut per romantica e rauba sentimentala da bratsch. Il cuntrari, quei che Maissen cultivava fuva musica el ver senn dil plaid. Ch'el dumignava orembora las ovras musicalas e sunava tut sil clavazin secapeva da sesez. El era in da quels dirigenti che ha la partitura el tgau e buca il tgau ella partitura. La direcziun deva ad el buc ina difficultad. Il chor saveva adina sefidar da siu dirigent, pertgei lez capeva da menar il tgamun, da tener a mistregn mintga vusch singula e d'indicar scadin passadi en moda suverana.

Sper la direcziun dils dus chors romontschs Alpina e Rezia a Cuera durant divers onns, ei sia activitad da dirigent seconcentrada e stada decisiva per la fundaziun ed il prosperar dil chor da baselgia dil Salvador, il qual el ha schaffiu ord nuot e dirigiù cun grond success 25 onns.

La regina dils instruments, l'orgla capeva e sunava Maissen cun inschign tut aparti, sco quei che paucs dirigenti ein el cass da far. Onns en ed onns ora ha el giu d'assister dumengia per dumengia a buca meins che treis survetschs divins, per dus fageva el igl organist e per la messa gronda funcziunava el sco dirigent. Tut las uras nunpagadas che scolast Maissen ha unfriu en quei senn, ein segiramein nudadas el cudisch dallas bunas ovras cun letteras grondas.

Las empremas canzuns ha scolast Giusep Maissen cumponiu ch'igl ei varga 30 onns. Ils davos temps denton eis el sededicaus pli che zacu alla cumposiziun da canzuns. E gest perquei vess el sco buc in auter giu las premissas da regalar al pievel romontsch aunc numerusas canzuns levas e grevas, per chor viril, chor mischedau e per affons*. E tut las canzuns da Giusep Maissen sedistinguan oravontut entras lur lingia tematica che ei bein semplia, mo adina motivada. La melodia ei dallas gadas populara meinsvart in stel melanconica.

* La gliesta da tut las canzuns che Giusep Maissen ha cumponiu e che ein aunc vendiblas sa vegnir retratga dalla Ligia Romontscha.

La gronda part da sias canzuns ein da tempra moderna. Sco prof. Duri Sialm da buna memoria stueva era Giusep Maissen schar fascinar igl emprem dalla poesia, dil plaid dil poet. Era el tschercava ed encureva adina puspei neuadora las nitscholas, las pli bialas da nossa litteratura sursilvana e surmirana. Ses poets preferi fuvan denter auter dr. G. Michel Nay, Gion Disch, Alfons Tuor, Gion Deplazes e tuttavia P. Alexander Lozza. Sia musica fuva vera inspiraziun. Dil s'avischinar al plaid nascheva la melodia entira ed entratga en in cul. Cura che Maissen veva cumponiu ina canzun, fuva ella fatga e finida. El saveva sez co ella tunassi cul chor vegni a cantar ella.

Che Giusep Maissen dumignava la cumposiziun ed era la greva, da gliez dattan sias canzuns grevas per chor viril perdetga, che han raccoltau accoglientscha ed era la duida renconuschientscha a caschun da differentas fiastas da cant circuitalas e cantunalas.

*

Cun quei, car amitg, hai jeu vuliu sespruar da mantener agl avegnir silmeins entginas, sche era mo munglusas indicaziuns da Tiu operar, schegie che Tia memoria vegn a restar viva en tias canzuns ed en Tia musica tier nies pievel romontsch schiditg che cuolms e vals stattan.

Nus denton che vein enconuschiu e carezau Tei, — Ti che fuvas la mudestadad sezza, adina survetscheivels e d'in character niebel e sincer, cun in'olma che era accesibla per il bi ed il bien — per nus restas Ti nunemblideivels. Ruaussa en la pasch dil Segner!

Ignazi Beer